

# 3 'wanita besi' penguat langkah reformasi, integriti tinggi DBKL



Presiden  
Pertubuhan  
Integriti dan  
Governans  
Malaysia (MIG)

**Oleh Datuk Seri Dr Akhbar Satar**  
bhrencana@bh.com.my

**Dalam** usaha membina negara berjaya dan berdaya saing, aspek tatakelola dan integriti menjadi nadi utama tidak boleh dipandang remeh.

Perdana Menteri, Datuk Seri Anwar Ibrahim sering menekankan keberhasilan negara bukan hanya bergantung kepada kemajuan ekonomi semata-mata, tetapi bagaimana tatakelola diurus dengan penuh integriti.

Naratif Malaysia MADANI cukup jelas menegaskan integriti adalah asas kepada kejayaan sesebuah negara. Namun begitu, isu rasuah membabitkan pihak berkuasa tempatan (PBT) sering mencemari usaha ke arah pembaharuan ini.

Baru-baru ini, kita dikejutkan dengan penangkapan beberapa orang staf Dewan Bandaraya Kuala Lumpur (DBKL) kerana terbabit dengan amalan rasuah.

Insiden yang menjadi rahsia terbuka ini menimbulkan keresahan dalam kalangan rakyat kerana mengharapkan pentadbiran bersih dan berintegriti tinggi.

Menteri di Jabatan Perdana Menteri (Wilayah Persekutuan), Dr Zaliha Mustafa, memainkan peranan signifikan dalam memastikan tiada ruang bagi potensi rasuah berlaku di Wilayah Persekutuan.

Berpandukan pendekatan "toleransi sifar" terhadap rasuah, beliau komited dan mengambil tindakan tegas dalam memastikan setiap urusan pentadbiran dijalankan dengan telus dan adil.

Dr Zaliha sering menekankan ketegasan dalam memerangi rasuah adalah kunci kepada pembentukan sebuah pentadbiran berintegriti dan bersih.

Pelantikan Datuk Bandar Kuala Lumpur yang baharu, Datuk Seri Maimunah Mohd Sharif juga dilihat sebagai satu langkah reformasi tatakelola sangat positif.

Maimunah mempunyai latar belakang kukuh dalam bidang perancangan bandar dan pembangunan lestari, individu berpengalaman luas pada peringkat antarabangsa.

Sebelum ini, beliau pernah dilantik sebagai Pengarah Eksekutif Program Penempatan Manusia Pertubuhan Bangsa-bangsa Bersatu (UN-Habitat), bertanggungjawab terhadap isu perumahan dan pembangunan bandar.

Maimunah pernah menjadi Datuk Bandar Pulau Pinang. Sebelum itu, beliau Yang Dipertua Majlis Perbandaran Seberang Perai (MPSP) dari 2011 dan wanita pertama dilantik mengetuai sesebuah kerajaan tempatan.

## Harapan besar KL diurus lebih cekap

Pelantikan beliau sebagai Datuk Bandar Kuala Lumpur membawa harapan besar bahawa Kuala Lumpur sedang diurus dengan lebih cekap dan



berintegriti tinggi.

Kehadiran tiga wanita besi dalam pentadbiran Kuala Lumpur, iaitu Dr Zaliha, Datuk Noridah Abdul Rahim (Ketua Pengarah Jabatan Wilayah Persekutuan) dan Maimunah adalah manifestasi jelas berkenaan usaha kerajaan memperkasa pentadbiran telus dan bertanggungjawab.

Ketiga-tiga ikon wanita ini bukan sahaja cemerlang dalam bidang masing-masing, tetapi membawa nilai integriti tinggi dalam pentadbiran mereka. Pemimpin wanita, apabila bekerja mereka tegas dan mengikut garis panduan yang ditetapkan.

Sebagai sebuah pertubuhan bukan kerajaan (NGO) memperjuangkan isu integriti, Pertubuhan Integriti dan Governans Malaysia (MIG) melihat pembinaan negara MADANI dibayangkan Perdana Menteri hanya akan tercapai apabila setiap lapisan masyarakat, terutama dalam sektor awam dan pentadbiran, menghayati prinsip integriti dalam setiap tindakan mereka.

Integriti bukan sekadar soal etika, tetapi asas kepada pembentukan sebuah negara adil, saksama dan makmur. Reformasi sedang berlaku ini perlu diteruskan dengan sokongan padu daripada semua pihak, termasuk rakyat yang perlu memainkan peranan dalam memantau dan memastikan setiap urusan pentadbiran dijalankan dengan telus.

Integriti adalah kunci memastikan segala dasar dan program dirancang dapat dilaksanakan dengan berkesan, seterusnya membentuk negara sejahtera dan berdaya saing pada peringkat global.

Rakyat Kuala Lumpur layak mendapat bandar raya diurus dengan penuh integriti dan berbekalkan barisan kepimpinan yang ada, DBKL akan menjadi contoh terbaik dalam aspek tatakelola bukan sahaja di Malaysia, tetapi juga pada peringkat antarabangsa.

Tanggungjawab kita bersama membina Kuala Lumpur ibu negara bebas rasuah dan menjadi kebanggaan seluruh rakyat, sekali gus menyumbang kepada kejayaan negara MADANI.